

“ТАСДИҚЛАЙМАН”

“KAFOLAT sug’urta kompaniyasi” AJ
акциядорларининг йиллик умумий
йиғилишининг
2023 йил “27” июндаги
5-сонли баёни



Умумий йиғилиш раиси

С. Абдуллаев

“KAFOLAT sug’urta kompaniyasi”
Aksiyadorlik jamiyati

У С Т А В И
(янги тахрирда)

ТОШКЕНТ шаҳри

1. УМУМИЙ ҚОИДАЛАР

1.1. «KAFOLAT sug'urta kompaniyasi» aksiyadorlik jamiyatining asosiy vazifalari va faoliyat йўналишлари Ўзбекистон Республикаси Қонунчилиги, мазкур Устав ҳамда Компаниянинг ички меъерий-ҳуқуқий ҳужжатлари билан белгилаб берилади. Компаниянинг фаолият муддати чекланмаган.

1.2. «KAFOLAT sug'urta kompaniyasi» AJ (кейинги ўринларда «Компания» деб аталади) ўз фаолиятини Ўзбекистон Республикаси Фуқаролик кодекси, «Суғурта фаолияти тўғрисида»ги, «Акциядорлик жамиятлари ва акциядорларнинг ҳуқуқларини ҳимоя қилиш тўғрисида»ги Ўзбекистон Республикаси Қонунларига ва бошқа қонун ҳужжатларига ва мазкур Уставга риоя қилган ҳолда амалга оширади.

1.3. Компаниянинг тўлиқ номи:

- ўзбек тилида: «KAFOLAT sug'urta kompaniyasi» aksiyadorlik jamiyati;
- рус тилида Акционерное общество «Страховая компания КАФОЛАТ»;
- инглиз тилида: «KAFOLAT Insurance Company» Joint-Stock Company.
- Компаниянинг қисқартирилган номи:
- ўзбек тилида: «KAFOLAT sug'urta kompaniyasi» AJ;
- рус тилида: АО «Страховая компания КАФОЛАТ»;
- инглиз тилида: «KAFOLAT Insurance Company» JSC.

1.4 Компаниянинг почта манзили: Ўзбекистон Республикаси, Тошкент шаҳри, Миробод тумани, Амир Темур шоҳ кўчаси 13 ва 13 “А”-уй.

Компаниянинг веб-сайти: www.kafolat.uz.

Компаниянинг электрон почта манзили: info@kafolat.uz.

1.5. Компания мустақил юридик шахс ҳисобланиб, қонун ҳужжатларига мувофиқ, ўз номидан мулкӣ ва шахсий номулкӣ ҳуқуқларни олиши ҳамда амалга ошириши, зиммасига мажбуриятлар олиши, судда даъвогар ва жавобгар бўлиши мумкин. Компания ўз мажбуриятлари юзасидан ўзига тегишли барча мол-мулклари билан жавобгар бўлади.

1.6. Компания ўзининг барча таркибий тузилмалари билан биргаликда ягона юридик шахс бўлиб, у мустақил балансда ҳисобга олинган алоҳида мол-мулкка эга. Компания ўз мулкларидан мустақил фойдаланади ва тасарруф этади, ўз номидан шартномалар тузиш, мулкӣ ва шахсий номулкӣ ҳуқуқларга эга бўлиш, зиммасига мажбуриятлар олиш, қонун ҳужжатларига мувофиқ ўз фаолиятининг мақсадларида ўз мулкига эгалик қилиш, фойдаланиш, бошқариш ва уни тасарруф қилиш, Ўзбекистон Республикаси ҳудудида ва ундан ташқарида банк ҳисобварақлари очишга ҳақлидир.

Компания ўзининг номи тўлиқ ёки қисқартирилиб ёзилган думалоқ муҳрига, штампларга, бланкларга ва ўз тимсолига эга бўлади. Компания ва унинг таркибий тузилмалари муҳрларида номи давлат тилида қўшимча равишда рус ёки инглиз тилида кўрсатилиши мумкин.

1.7. Компаниянинг ташкилий тузилмаси қуйидагилардан иборатдир:

- Акциядорларнинг умумий йиғилиши;
- Кузатув кенгаши;
- Бош директор/Ижроия органи (Бошқарув/Бошқарув аппарати);
- Компаниянинг Қорақалпоғистон Республикаси, вилоятлар ва Тошкент шаҳридаги филиаллари;
- Компаниянинг туман ва шаҳарлардаги суғурта марказлари.

Компания ўз филиаллари ва суғурта марказлари мажбуриятлари юзасидан жавобгар бўлади.

1.8. Акциядорлар Компаниянинг мажбуриятлари юзасидан жавобгар бўлмайди ва унинг фаолияти билан боғлиқ зиёнларни ўзларига тегишли акциялар қиймати доирасида тўлайди. Акциялар ҳақининг ҳаммасини тўламаган акциядорлар Компания мажбуриятлари юзасидан

ўзларига тегишли акциялар қийматининг тўланмаган қисми доирасида солидар жавобгар бўладилар.

Компания ўз акциядорларининг мажбуриятлари юзасидан жавобгар бўлмайди.

1.9. Компания давлатнинг ва унинг органлари ўз зиммасига олган мажбуриятлари юзасидан жавобгар бўлмайди, худди шунингдек давлат ва унинг органлари Компаниянинг ўз зиммасига олган мажбуриятлари юзасидан жавобгар бўлмайди.

2. ФАОЛИЯТНИНГ СОҲАСИ (АСОСИЙ ЙЎНАЛИШЛАРИ), МАҚСАД ВА ФУНКЦИЯЛАРИ

2.1. Компания фаолиятининг асосий йўналиши суғурта бозори профессионал иштирокчиси сифатида суғуртани амалга оширишдир. Компания фаолиятининг мақсади мижозларга сифатли хизмат кўрсатиш ҳамда фойда олиш.

“КАFOLAT sug’urta kompaniyasi” AJ ўз тизимида:

ҳаётни суғурталаш бўйича масъулияти чекланган жамият шаклида ихтисослаштирилган суғурта компаниясини ташкил этади ва фаолиятини тугатиш бўйича қарор қабул қилади;

техник, тиббий ва юридик ассистанс хизматини кўрсатувчи ассистанс ташкилотини ташкил этади ва фаолиятини тугатиш бўйича қарор қабул қилади.

2.2 Компания ўзига юклатилган вазифаларни амалга оширишда қуйидаги функцияларни бажаради:

а) Ўзбекистон Республикасининг қонун ҳужжатларида белгиланган тартибда ва шартларда суғуртанинг ихтиёрий ва мажбурий турларини амалга оширади, маҳаллий ва хорижий юридик ҳамда жисмоний шахсларга суғурта хизматлари кўрсатади;

б) белгиланган тартибга биноан суғурта товони миқдорини аниқлайди ҳамда юридик ва жисмоний шахсларга суғурта товони тўловини амалга оширади;

в) Компания амалга ошириладиган суғурта турларига доир қоидаларни (шартларни) қонун ҳужжатларига мувофиқ белгилайди, суғурта қилдирувчиларнинг эҳтиёжларини тўлиқроқ қаноатлантирилишига ёрдам берувчи янги суғурта турларини ишлаб чиқади ҳамда татбиқ этади;

г) қабул қилинган суғурта мажбуриятлари бажарилишини таъминлаш учун Компания ҳам сўмда, ҳам чет эл валютасида тўланган суғурта мукофотларидан махсус ваколатли давлат органи белгилаган тартибда ва шартларда суғурта захираларини шакллантиради ҳамда жойлаштиради.

д) биргаликда суғурталаш ва қайта суғурталаш шартномаларига асосан тўлов операцияларини Ўзбекистон Республикаси миллий валютасида, шунингдек чет эл валютасида амалга оширади;

е) Компания ўз суғурта фаолиятини оммавий ахборот воситалари орқали реклама қилади, суғурта масалалари бўйича маслаҳатлар беради.

ж) инвестиция фаолиятини амалга оширади, қимматли қоғозлар бозорида инвестиция воситачиси сифатида профессионал фаолиятни амалга оширади;

з) суғурталаш (қайта суғурталаш) соҳасида мутахассисларнинг малакасини ошириш билан боғлиқ фаолиятни, шунингдек суғурта агенти сифатида суғурта воситачилиги билан боғлиқ бўлган фаолиятни амалга оширади;

и) Ўзбекистон Республикаси вазирликлари ва давлат ташкилотлари, ҳамда чет давлатларнинг суғурта ташкилотлари билан алоқалар ўрнатади, ҳамкорлик қилади ва биргаликда суғурта фаолиятини юритади;

к) чет эл суғурталовчиларига сюрвейер ва аждастер хизматларини кўрсатади;

л) Компания қонунда белгиланган тартибда чет давлатларда ҳам суғурта ташкилотлари, қўшма корхоналар ва хўжалик юритувчи бошқа субъектлар ташкил қилиши, ёки чет давлат ташкилотларига улуш қўшиш йўли билан иштирок этиши мумкин;

м) бошқа қонунчилик билан чекланмаган фаолият тури билан шуғулланиш;

н) компания ихтиёридаги биноларни ижарага бериши мумкин;

о) ўз эҳтиёжлари учун сотиб олинган ёки суғурта шартномасини амалга ошириш натижасида ўз ихтиёрига ўтган мол-мулкни сотиш ва ижарага беришга.

Компания Ўзбекистон Республикасида ва Республика ташқарисида ўз вакиллигини очиши мумкин, вакиллик Компаниянинг таркибий бўлинмаси ҳисобланади.

3. НАЗОРAT VA BOШҚARUV ОРГАНЛАРИ

Компания Акциядорларининг умумий йиғилиши, Кузатув кенгаши ва Бош директор/Ижроия органи (Бошқарув/Бошқарув аппарати) - Компаниянинг назорат ва бошқарув органи ҳисобланадилар.

Компания тизимида миноритар акциядорлар Қўмитаси ташкил қилиниши мумкин. Миноритар акциядорлар Қўмитаси ўз фаолиятида қонун ҳужжатларига, ушбу Уставга ва «KAFOLAT sug'urta kompaniyasi» AJ миноритар акциядорлар Қўмитасининг фаолият кўрсатиши тартиби тўғрисидаги Низомга риоя этади. Миноритар акциядорлар Қўмитаси уч нафар аъзодан иборат бўлиб, акциядорлар Умумий йиғилиши томонидан бир йил муддатга сайланадилар. Миноритар акциядорлар Қўмитаси таркибига сайланган шахсларнинг қайта сайланишлари чекланмайди.

Шунингдек, Компания тизимида корпоратив маслаҳатчи лавозими жорий этилади.

АКЦИЯДОРЛАРНИНГ УМУМИЙ ЙИҒИЛИШИ

3.1. Акциядорларнинг умумий йиғилиши, Компаниянинг юқори бошқарув органи бўлиб, Компания фаолияти билан боғлиқ ваколат доирасидаги барча масалаларни ҳал қилади, ўз фаолиятида қонун ҳужжатларига, ушбу Уставга ва «KAFOLAT sug'urta kompaniyasi» AJ Акциядорларининг умумий йиғилиши тўғрисидаги Низомга риоя этади.

Акциядорлар умумий йиғилишининг ваколатларига қуйидагилар киради:

- Компаниянинг уставига ўзгартириш ва қўшимчалар киритиш ёки Компаниянинг янги тахрирдаги уставини тасдиқлаш;
- Компанияни қайта ташкил этиш;
- Компанияни тугатиш, тугатувчини (тугатиш комиссиясини) тайинлаш ҳамда оралиқ ва якуний тугатиш балансларини тасдиқлаш;
- Компания кузатув кенгашининг ва миноритар акциядорлар қўмитасининг сон таркибини белгилаш, уларнинг аъзоларини сайлаш ва аъзоларнинг ваколатларини муддатидан илгари тугатиш;
- эълон қилинган акцияларнинг энг кўп миқдорини белгилаш;
- Компаниянинг устав фондини (устав капиталини) камайтириш;
- ўз акцияларини олиш;
- Компаниянинг ташкилий тузилмасини тасдиқлаш;
- Бош директори/Бошқарув раиси (Бошқарув аппарати бош директори)ни сайлаш (тайинлаш) ва уни ваколатларини муддатидан илгари тугатиш. Бунда Компания Кузатув кенгаши Компаниянинг Бош директор/Бошқарув раиси (Бошқарув аппарати бош директори) билан тузилган шартномани, агар у шартнома шартларини бузган тақдирда тугатишга (бекор қилишга) ҳақли;
- Компаниянинг йиллик ҳисоботини, шунингдек, компания фаолиятининг асосий йўналишлари ва мақсадидан келиб чиққан ҳолда компанияни ўрта муддатга ва узоқ муддатга ривожлантиришнинг аниқ муддатлари белгиланган стратегиясини тасдиқлаш;
- Компаниянинг фойдалари ва зарарларини тақсимлаш;
- Компания миноритар акциядорлар қўмитасининг қабул қилинган қарорлар тўғрисида ҳисоботини, Кузатув кенгашининг ўз ваколатлари доирасига кирадиган масалалар юзасидан, шу жумладан Компанияни бошқаришга доир қонун ҳужжатларида белгиланган талабларга риоя этилиш юзасидан Компания Кузатув кенгашининг ҳисоботларини эшитиш;
- имтиёзли ҳуқуқни қўлламаслик тўғрисида амалдаги қонун ҳужжатлари назарда тутилган қарорни қабул қилиш;
- акциядорлар умумий йиғилишининг регламентини тасдиқлаш;
- акцияларни майдалаш ва йириклаштириш;
- Компания Бош директор/Ижроия органи (Бошқарув/Бошқарув аппарати)га тўланадиган ҳақ ва (ёки) компенсацияларининг энг юқори миқдорини белгилаш;

- қонун ҳужжатларида назарда тутилган ҳолларда компания томонидан йирик битимлар ва компания аффилиланган шахслари билан битимлар тузиш тўғрисида қарор қабул қилиш;
- мажбурий аудиторлик текширувини ўтказиш учун аудиторлик ташкилотини белгилаш, ушбу ташкилотнинг хизматларига тўланадиган энг кўп ҳақ миқдори ва у билан шартнома тузиш (шартнома бекор қилиш) тўғрисида қарор қабул қилиш;
- қонун ҳужжатларига ҳамда ушбу Уставда назарда тутилган бошқа масалаларни ҳал этиш.

Акциядорлар умумий йиғилишининг ваколат доирасига киритилган масалалар Компаниянинг Бош директор/Ижроия органи (Бошқарув/Бошқарув аппарати)га ҳал қилиши учун берилиши мумкин эмас.

3.2. Акциядорларнинг умумий йиғилишини компания кузатув кенгашининг раиси, у узрли сабабларга кўра бўлмаган тақдирда эса, компания кузатув кенгашининг аъзоларидан бири олиб боради.

Компания ҳар йили акциядорларнинг умумий йиғилишини (акциядорларнинг йиллик умумий йиғилишини) ўтказиши шарт.

Акциядорларнинг йиллик умумий йиғилиши молия йили тугаганидан кейин олти ойдан кечиктирмай ўтказилади. Акциядорларнинг йиллик умумий йиғилиши, одатда, ҳар йил июнь ойининг охиригга жума кунда ўтказилади. Шу билан бирга, кузатув кенгаши томонидан, йиғилиш ўтказилиши учун ушбу санадан олдинроқ сана ҳам белгиланиши мумкин.

Акциядорларнинг йиллик умумий йиғилишида компаниянинг миноритар акциядорлар қўмитасини, Кузатув кенгашини сайлаш тўғрисидаги, Компаниянинг Бош директор/Бошқарув раиси (Бошқарув аппарати бош директори) билан тузилган шартноманинг муддатини узайтириш, уни қайта тузиш ёки бекор қилиш мумкинлиги ҳақидаги масалалар ҳал этилади, шунингдек Компания йиллик ҳисоботи, Компания Бош директори/Ижроия органи (Бошқарув/Бошқарув аппарати) ва Кузатув кенгашининг Компанияни ривожлантириш стратегиясига эришиш бўйича кўрилаётган чора-тадбирлар тўғрисидаги ҳисоботлари ва бошқа ҳужжатлари кўриб чиқилади.

Акциядорларнинг йиллик умумий йиғилишидан ташқари ўтказиладиган умумий йиғилишлари навбатдан ташқари йиғилиш ҳисобланади.

Акциядорларнинг умумий йиғилиши ўтказиладиган сана ва уни ўтказиш тартиби, йиғилиш ўтказилиши ҳақида акциядорларга хабар бериш тартиби, акциядорларнинг умумий йиғилишини ўтказишга тайёргарлик вақтида акциядорларга бериладиган материаллар (ахборотлар) рўйхати Компаниянинг Кузатув кенгаши томонидан белгиланади.

3.3. Акциядорларнинг умумий йиғилишини ўтказиш тўғрисидаги хабар акциядорларнинг умумий йиғилиши ўтказиладиган санадан камида йигирма бир кундан кечиктирмай, лекин узоғи билан ўттиз кун олдин Корпоратив ахборотнинг ягона порталида, Компаниянинг расмий веб-сайтида ва оммавий ахборот воситаларида эълон қилинади, шунингдек акциядорларга электрон почта орқали юборилади.

Акциядорларнинг умумий йиғилишини ўтказиш тўғрисидаги хабарда қуйидагилар кўрсатилиши керак:

- Компания номи, жойлашган ери (почта манзили) ва электрон почта манзили;
- умумий йиғилиш ўтказиладиган сана, вақт ва жой;
- компания акциядорларининг реестри шакллантириладиган сана;
- умумий йиғилиш кун тартибига киритилган масалалар;
- умумий йиғилишни ўтказишга тайёргарлик кўрилаётганда акциядорларга тақдим этилиши лозим бўлган ахборот (материаллар) билан акциядорларни таништириш тартиби;
- акциядорларнинг умумий йиғилишида иштирок этиш ва овоз бериш, шу жумладан ахборот-коммуникация технологияларидан фойдаланган ҳолда масофадан туриб иштирок этиш ва овоз бериш тартиби.

Акциядорларнинг умумий йиғилишини ўтказишга тайёргарлик кўрилаётганда акциядорларга тақдим этилиши лозим бўлган ахборотга (материалларга) Компаниянинг йиллик ҳисоботи, йиллик молия-хўжалик фаолиятини текшириш натижалари юзасидан аудиторлик

ташкilotининг хулосаси, Компания Кузатув кенгашининг Бош директор/Ижроия органи (Бошқарув раиси/Бошқарув аппарати бош директори ва унинг аъзолари) билан тузилган шартноманинг амал қилиш муддатини узайтириш, шартномани қайта тузиш ёки бекор қилиш мумкинлиги тўғрисидаги хулосаси, шунингдек Компаниянинг Кузатув кенгаши аъзолигига номзодлар тўғрисидаги маълумотлар, Компаниянинг уставига киритиладиган ўзгартиш ва қўшимчалар лойиҳаси ёхуд Компаниянинг янги таҳрирдаги устави лойиҳаси киради.

Акциядорларнинг умумий йиғилишини ўтказишга тайёргарлик кўриладиганда акциядорларга тақдим этилиши мажбурий бўлган қўшимча ахборотнинг (материалларнинг) рўйхати қимматли қоғозлар бозорини тартибга солиш бўйича ваколатли давлат органи томонидан белгиланиши мумкин.

Акциядорларнинг умумий йиғилишини ўтказиш чоғида умумий йиғилишда, кун тартибидаги масалаларни муҳокама қилиш ва овозга қўйилган масалалар бўйича қарорлар қабул қилишда иштирок этиш имкониятини берадиган ахборот-коммуникация технологияларидан фойдаланилиши мумкин.

Акциядорларга берилиши лозим бўлган ахборотдан (материаллардан) акциядорларнинг умумий йиғилишида иштирок этадиган, шу жумладан ахборот-коммуникация технологияларидан фойдаланган ҳолда масофадан туриб иштирок этадиган шахслар акциядорларнинг умумий йиғилиши ўтказилгунигача қадар ва уни ўтказиш вақтида фойдалана олиш имкониятига эга бўлиши керак.

3.4. Агар акциядорларнинг умумий йиғилишида иштирок этиш, шу жумладан ахборот-коммуникация технологияларидан фойдаланган ҳолда масофадан туриб иштирок этиш учун рўйхатдан ўтказиш тугалланган пайтда компаниянинг жойлаштирилган овоз берувчи акцияларининг жами эллик фоизидан кўпига эга бўлган акциядорлар (уларнинг вакиллари) рўйхатдан ўтган бўлса, акциядорларнинг умумий йиғилиши ваколатли (кворумга эга) бўлади.

Акциядорларнинг умумий йиғилишини ўтказиш учун кворум бўлмаса, акциядорларнинг такрорий умумий йиғилишини ўтказиш санаси эълон қилинади. Акциядорларнинг такрорий умумий йиғилишини ўтказишда кун тартибини ўзгартиришга йўл қўйилмайди.

Агар акциядорларнинг ўтказилмай қолган йиғилиши ўрнига чақирилган такрорий умумий йиғилишида иштирок этиш учун рўйхатдан ўтказиш тугалланган пайтда компаниянинг жойлаштирилган овоз берувчи акцияларининг жами қирк фоизидан ортиқ овозига эга бўлган акциядорлар (уларнинг вакиллари) рўйхатдан ўтказилган бўлса, акциядорларнинг такрорий умумий йиғилиши ваколатли бўлади.

Акциядорларнинг такрорий умумий йиғилишини ўтказиш тўғрисида хабар қилиш ушбу Уставнинг 3.3.-бандида назарда тутилган муддатларда ва шаклда амалга оширилади.

Кворум бўлмаганлиги сабабли акциядорларнинг умумий йиғилишини ўтказиш санаси йигирма кундан кам муддатга кучирилган тақдирда, умумий йиғилишда иштирок этиш ҳуқуқига эга бўлган акциядорлар ўтказилмай қолган умумий йиғилишда иштирок этиш, шу жумладан ахборот-коммуникация технологияларидан фойдаланган ҳолда масофадан туриб иштирок этиш ҳуқуқига эга бўлган компания акциядорларининг реестрига мувофиқ аниқланади.

3.5. Акциядорлар умумий йиғилишида овозга қўйилган масалалар бўйича компаниянинг оддий акцияларининг эгалари бўлмиш акциядорлар ва амалдаги қонунчиликда назарда тутилган ҳолларда Компания имтиёзли акцияларининг эгалари бўлмиш акциядорлар овоз бериш ҳуқуқига эгадир.

Овозга қўйилган масала бўйича акциядорлар умумий йиғилишининг қарори, агар бошқа қоида белгиланганмаган бўлса, компаниянинг овоз берувчи акциялари эгалари бўлган, йиғилишда иштирок этаётган, акциядорларнинг кўпчилик (оддий кўпчилик) овози билан қабул қилинади.

Акциядорларнинг умумий йиғилишида овоз бериш «компаниянинг овоз берувчи битта акцияси - битта овоз» принципи бўйича амалга оширилади, бундан Компаниянинг Кузатув кенгаши аъзоларини сайлаш бўйича кумулятив овоз беришни ўтказиш ҳоллари мустасно.

Акциядорларнинг умумий йиғилишида кун тартибидаги масалалар бўйича овоз бериш овоз бериш бюллетенлари орқали ёки ахборот-коммуникация технологияларидан фойдаланган ҳолда масофадан туриб амалга оширилади.

Акциядорларнинг умумий йиғилишида кун тартибидаги масалалар бўйича ахборот-коммуникация технологияларидан фойдаланган ҳолда масофадан туриб овоз берилганда овоз бериш бюллетенларидан фойдаланилмайди. Бунда овозга қўйилган масалалар бўйича қабул қилинган қарорнинг қонунийлиги акциядорни акциядорларнинг умумий йиғилишида иштирок этиш учун рўйхатга олишда фойдаланиладиган электрон рақамли имзо билан тасдиқланади.

3.6. Акциядорларнинг умумий йиғилиши қонунчиликда белгиланган қарорлар бўйича Умумий йиғилишда иштирок этаётган овоз берувчи акцияларнинг эгалари бўлмиш акциядорларнинг тўртдан уч қисмидан иборат кўпчилик овози билан қабул қилинади:

- Компания Уставига ўзгартириш ва қўшимчалар киритиш ёки компаниянинг янги таҳрирдаги Уставини тасдиқлаш;
- Компанияни қайта ташкил қилиш;
- Компанияни тугатиш, тугатувчини тайинлаш ҳамда оралик ва якуний тугатиш балансларини тасдиқлаш;
- эълон қилинган акцияларнинг энг кўп миқдорини белгилаш;
- баланс қиймати ёки олиш қиймати битим тузиш тўғрисида қарор қабул қилинаётган санада компания соф активлари миқдорининг эллик фоизидан ортигини ташкил этувчи мол-мулк хусусида йирик битим тузиш тўғрисидаги қарор акциядорларнинг умумий йиғилиши томонидан қабул қилинади;
- йирик битим тузиш масаласи бўйича Компания Кузатув кенгашининг яқдиллигига эришилмаган тақдирда йирик битим тузиш тўғрисидаги масала Кузатув кенгашининг қарорига кўра акциядорларнинг умумий йиғилиши ҳал қилиши учун олиб чиқиш;
- аффилиланган шахс билан тузилаётган битимни маъқуллаш ҳақидаги қарор мажлисда иштирок этаётган компания кузатув кенгаши аъзолари томонидан бир овоздан ёхуд акциядорларнинг умумий йиғилишида иштирок этаётган акциядорларнинг малакали кўпчилик овози билан қабул қилиш;
- амалдаги қонунчиликда белгиланган ҳолларда ва тартибда йирик битимларни тузиш;
- Компания Кузатув кенгашининг ўз ваколат доирасига қирадиган масалалар юзасидан, шу жумладан Компанияни бошқаришга доир қонун ҳужжатларида белгиланган талабларга риоя этилиши юзасидан Кузатув кенгашининг ҳисоботларини эшитиш.

Йирик битим бўйича акциядорлар умумий йиғилиши ёки Кузатув кенгаши қарор қабул қилганидан кейин Компаниянинг Бош директори/Ижроия органи (Бошқарув/Бошқарув аппарати) томонидан ижроси амалга оширилади. Бунда йирик битим тузиш тўғрисидаги қарор мол-мулкнинг қонун ҳужжатларига мувофиқ баҳоловчи ташкилот томонидан белгиланган бозор қиймати ҳисобга олинган, мустақил ташқи аудиторлик ташкилоти томонидан битимнинг шартлари ўрганилган ҳолда мажбурий тартибда қабул қилинади.

3.7. Акциядорларнинг умумий йиғилиши кун тартибига киритилмаган масалалар бўйича қарор қабул қилишга, шунингдек кун тартибига ўзгартиришлар киритишга ҳақли эмас.

3.8. Умумий йиғилиш қабул қилган қарорлар Компаниянинг ҳамма акциядорлари учун мажбурийдир.

Фақат узрли сабабларга кўра акциядорлар умумий йиғилишида иштирок этмаган ёки бундай қарор қабул қилинишига қарши овоз берган акциядор, акциядорларнинг умумий йиғилишида қабул қилинган қарор устидан судга шикоят қилишга ҳақлидир.

3.9. Акциядорларнинг умумий йиғилиши томонидан қабул қилинган қарорлар, шунингдек овоз бериш якунлари бу қарорлар қабул қилинган санадан эътиборан ўттиз кундан кечиктирмай акциядорлар эътиборига етказилади.

3.10. Акциядорларнинг умумий йиғилишида иштирок этиш, шу жумладан ахборот-коммуникация технологияларидан фойдаланган ҳолда масофадан туриб иштирок этиш ҳуқуқига эга акциядорларнинг умумий йиғилиши ўтказиладиган санадан уч иш куни олдин шакллантирилган Компания акциядорларининг реестрида қайд этилган акциядорлар эга бўлади.

3.11. Компания овоз берувчи акцияларининг ҳаммаси бўлиб камида бир фоизига эгаллик қилувчи акциядорлар (акциядор) Компаниянинг молия йили тугаганидан кейин узоғи билан 90 кун ичида акциядорларнинг йиллик умумий йиғилиши кун тартибига масалалар киритишга ва Компаниянинг Кузатув кенгашига ушбу кенгашнинг сон таркибидан ошмайдиган тарзда номзодлар кўрсатишга ҳақли, бундан Кузатув кенгашининг мустақил аъзолигига номзодлар кўрсатиш бундан мустасно.

Миноритар акциядорлар (акциядор) молия йили тугаганидан кейин узоғи билан 90 кун ичида Компания акциядорларнинг йиллик умумий йиғилиши кун тартибига миноритар акциядорлар қўмитаси таркибига бу органнинг миқдор таркибидан ошмайдиган тарзда номзодлар кўрсатишга ҳақли.

Акциядорлар (акциядор) компания миноритар акциядорлар Қўмитаси, кузатув кенгаши ўзлари кўрсатган номзодлар рўйхатига Компания акциядорларининг умумий йиғилиши ўтказилиши тўғрисидаги хабар эълон қилинган санадан эътиборан уч иш кунидан кечиктирмай ўзгартишлар киритишга ҳақли.

Акциядорлар умумий йиғилишининг кун тартибига масала уни қўйиш сабабларини, масалани таклиф этаётган акциядорнинг (акциядорларнинг) номини, унга тегишли акцияларнинг сони ва тўрини кўрсатган ҳолда ёзма равишда киритилади.

Компания миноритар акциядорлар Қўмитаси ва Кузатув кенгашига номзодлар кўрсатиш, шу жумладан ўзининг номзодини кўрсатиш тўғрисида таклиф киритилганда номзоднинг исми, башарти номзод Компания акциядори бўлса, унга тегишли акцияларнинг сони ва тури, шунингдек номзодни кўрсатган акциядорларнинг исми, уларга тегишли акцияларнинг сони ва тури кўрсатилади.

Овоз бериш яқунлари бўйича санок комиссияси овоз бериш яқунлари тўғрисида санок комиссияси аъзолари томонидан имзоланадиган баённома тузади. Овоз бериш яқунлари тўғрисидаги баённома акциядорлар умумий йиғилишининг, шу жумладан ахборот-коммуникация технологияларидан фойдаланган ҳолда масофадан туриб ўтказиладиган умумий йиғилишининг кворуми мавжудлиги ҳақидаги маълумотни ўз ичига олади.

Овоз бериш яқунлари тўғрисидаги баённома тузилганидан ва акциядорлар умумий йиғилишининг баённомаси имзоланганидан кейин акциядорларнинг қоғоздаги ёки электрон жисмдаги овоз бериш бюллетенлари санок комиссияси томонидан муҳрланади ва Компания архивига сақлаш учун топширилади.

3.12. Компания акциядорлар умумий йиғилишида иштирок этувчи шахсга шундай шахс ҳисобидан ўзи тўлдирган бюллетень нусхасини олиш имконини беради.

КУЗАТУВ КЕНГАШИ

3.13. Компаниянинг Кузатув кенгаши Компания фаолиятига умумий раҳбарликни амалга оширади, акциядорлар умумий йиғилишининг ваколат доирасига киритилган масалаларни ҳал этиш бундан мустасно. Кузатув кенгашининг фаолияти Компания акциядорларининг умумий йиғилиши тасдиқлаган Кузатув кенгаши ҳақидаги Низом билан белгиланади.

Акциядорлар умумий йиғилишининг қарорига кўра Компания Кузатув кенгашининг аъзоларига улар ўз вазифаларини бажариб турган давр учун ҳақ тўланиши ва (ёки) Кузатув кенгашининг аъзоси вазифаларини бажариш билан боғлиқ харажатларининг ўрни қопланиши мумкин. Бундай ҳақ ва тўловларнинг миқдорлари акциядорларнинг умумий йиғилиши қарорида белгиланади.

Энг муҳим масалаларни кўриб чиқиш ва Компаниянинг Кузатув кенгашига тавсиялар тайёрлаш учун Кузатув кенгаши аъзолари орасидан қўмиталар ташкил этилиши мумкин.

3.14. Компания Кузатув кенгаши етти нафар аъзодан иборат бўлиб, шунингдек биттадан кам бўлмаган мустақил аъзо киритилади, улар қонун ҳужжатларида ва ушбу уставда назарда тутилган тартибда акциядорлар Умумий йиғилиши томонидан уч йил муддатга сайланадилар. Компания кузатув кенгашининг мустақил аъзолари кузатув кенгаши аъзолари каби ушбу уставда назарда тутилган тартибда сайланадилар.

Компания кузатув кенгаши таркибига сайланган шахсларнинг қайта сайланишлари чекланмайди.

Компания Бош директори/Ижроия органи (Бошқарув/Бошқарув аппарати)нинг аъзолари Кузатув кенгашига сайланишлари, тайинланишлари мумкин эмас.

Компанияда меҳнат шартномаси (контракт) бўйича ишлаётган шахслар Компаниянинг Кузатув кенгаши аъзолари бўлиши мумкин эмас.

Компаниянинг Кузатув кенгаши аъзолари сайлови кумулятив овоз бериш орқали амалга оширилади. Кумулятив овоз беришда ҳар бир акциядорга тегишли овозлар сони Компаниянинг Кузатув кенгашига сайланиши керак бўлган мустақил аъзолар ва бошқа аъзолар сонига алоҳида кўпайтирилади ҳамда акциядор шу тариқа олинган овозларни битта номзодга тўлиқ беришга ёки икки ва ундан ортиқ номзодлар ўртасида тақсимлашга ҳақли.

Энг кўп овоз тўплаган номзодлар Кузатув кенгаши таркибига сайланган деб ҳисобланади.

Акциядорларнинг умумий йиғилишида сайланган Кузатув кенгаши аъзоси мазкур йиғилиш баённомасида қайси акциядорнинг вакили эканлиги ёки Кузатув кенгашининг қайси аъзоси мустақил аъзо эканлиги кўрсатилиши керак.

3.15. Компания Кузатув кенгашининг раиси кузатув кенгаши аъзолари томонидан уларнинг ўзлари орасидан Кузатув кенгаши аъзолари умумий сонига нисбатан кўпчилик овоз билан сайланади.

Компания Кузатув кенгаши ўз раисини кузатув кенгаши жами аъзоларининг кўпчилик овози билан қайта сайлашга ҳақлидир.

Компания Кузатув кенгашининг раиси унинг ишини ташкил этади, кузатув кенгаши мажлисларини чақиради ва уларда раислик қилади, мажлисда баённома юритилишини ташкил этади, компания акциядорлари умумий йиғилишида раислик қилади.

Компания Кузатув кенгашининг раиси йўқлигида унинг вазифасини кузатув кенгаши аъзоларидан бири бажариб туради.

3.16. Компания Кузатув кенгашининг мажлиси Кузатув кенгашининг раиси томонидан унинг ўз ташаббуси билан, Кузатув кенгашининг аъзоси, Компания Бош директори/Ижроия органи (Бошқарув/Бошқарув аппарати) нинг, шунингдек Компания ички аудит хизмати бошлиғи талабига биноан чақиради.

Компаниянинг 1 (бир) фоиздан кам бўлмаган оддий акциялари эгаларига Кузатув кенгаши мажлисини чақиришни талаб қилиш ва кун тартиби, фойдани тақсимлаш, назорат ва бошқарув органи аъзолигига уларнинг номзодини (умумий йиғилиш ўтказилгунга қадар алмаштириш имконияти билан) кўрсатиш юзасидан таклиф киритиш ҳуқуқини тақдим этади.

Кузатув кенгаши мажлисини ўтказиш учун кворум кузатув кенгашига сайланган аъзоларнинг камида етмиш беш фоиздан иборат. Кузатув кенгаши аъзоларининг сони ушбу уставда назарда тутилган миқдорнинг етмиш беш фоиздан кам бўлиб қолса, Компания Кузатув кенгашининг янги таркибини сайлаш учун акциядорларнинг навбатдан ташқари умумий йиғилишини чақириши шарт. Кузатув кенгашининг қолган аъзолари акциядорларнинг ана шундай навбатдан ташқари умумий йиғилишини чақириш тўғрисидагина қарор қабул қилишга, шунингдек Компания Бош директори/Бошқарув раиси (Бошқарув аппарати бош директори)нинг ваколатлари муддатидан илгари тугатилган тақдирда унинг вазифасини вақтинча бажарувчини тайинлашга ҳақлидир.

Кузатув кенгашининг мажлисида қарорлар, агар амалдаги қонунчиликда ва ушбу уставда ўзгача қоидалар назарда тутилмаган бўлса, мажлисда ҳозир бўлганларнинг кўпчилик овози билан қабул қилинади. Компания кузатув кенгаши мажлисида масалалар ҳал этилаётганда кузатув кенгашининг ҳар бир аъзоси битта овозга эга бўлади.

Компаниянинг устав фондани (устав капиталини) қўшимча акцияларни жойлаштириш йўли билан кўпайтириш тўғрисидаги ва компаниянинг уставига тегишли ўзгаришлар киритиш ҳақидаги

қарорлар компания кузатув кенгаши томонидан бир овоздан қабул қилинади.

Аффилиланган шахс билан битим тузиш тўғрисидаги қарор мазкур битимни тузишдан манфаатдор бўлмаган кузатув кенгаши аъзолари томонидан бир овоздан қабул қилинади. Компаниянинг аффилиланган шахси кузатув кенгаши мазкур битим юзасидан қарор қабул қилаётганда муҳокамада иштирок этишга ҳақли эмас ва овоз бериш ҳуқуқига эга эмас.

Кузатув кенгашининг бир аъзоси ўз овозини кузатув кенгашининг бошқа аъзосига беришига йўл қўйилмайди.

Кузатув кенгаши аъзоларининг овозлари тенг бўлинган ҳолларда кузатув кенгашининг қарорини қабул қилишда кузатув кенгаши раиси ҳал қилувчи овоз ҳуқуқига эгадир.

Кузатув кенгашининг мажлисида баённома юритилади. Кузатув кенгаши мажлисининг баённомаси мажлис ўтказилганидан сўнг 10 кундан кечиктирмай тузилади. Мажлис баённомасида қуйидагилар кўрсатилади:

- мажлис ўтказилган сана, вақт ва жой;
- мажлисда иштирок этадиган, шу жумладан ахборот-коммуникация технологияларидан фойдаланган ҳолда масофадан туриб иштирок этадиган шахслар;
- мажлиснинг кун тартиби;
- овоз беришга қўйилган масалалар, улар юзасидан ўтказилган овоз бериш яқунлари;
- қабул қилинган қарорлар.

Компания Кузатув кенгаши мажлисининг баённомаси мажлисда иштирок этаётган компания кузатув кенгаши аъзолари томонидан имзоланади, улар мажлис баённомаси тўғри расмийлаштирилиши учун жавобгар бўлади.

Кузатув кенгашининг қарорлари сиртдан овоз бериш йўли билан (сўров йўли билан) қабул қилиниши мумкин. Кузатув кенгашининг сиртдан овоз бериш йўли билан (сўров йўли билан) қабул қилинадиган қарорлари компания кузатув кенгашининг барча аъзолари томонидан бир овоздан қабул қилинади.

Компания Кузатув кенгашининг баённомаси у имзоланган куни Компаниянинг Бош директори/Ижроия органи (Бошқарув/Бошқарув аппарати)га ижро этиш учун топширилади. Кузатув кенгаши акциядорларнинг умумий йиғилишини чақириш тўғрисида қарор қабул қилган тақдирда мазкур қарор ҳақидаги ахборот Компаниянинг Бош директори/Ижроия органи (Бошқарув/Бошқарув аппарати)га Кузатув кенгашининг мажлиси ўтказиладиган куни топширилади.

3.17. Компания Кузатув кенгашининг ваколат доирасига қуйидагилар киради:

– Компанияни ривожлантириш стратегиясига эришиш бўйича кўрилатган чоратadbирлар тўғрисида Компания Бош директори/Ижроия органи (Бошқарув/Бошқарув аппарати)нинг ҳисоботини мунтазам равишда эшитиб борган ҳолда Компания фаолиятининг устувор йўналишларини белгилаш. Компания ривожланиш режасини ишлаб чиқишни ташкил этиш ва унда белгиланган мақсадларга эришиш мониторинги учун экспертларни жалб этиш;

– Компания акциядорларининг йиллик ва навбатдан ташқари умумий йиғилишларини чақириш, бундан Компания Кузатув кенгаши амалдаги қонунчиликда белгиланган муддат ичида акциядорларнинг навбатдан ташқари умумий йиғилишини чақириш тўғрисида қарор қабул қилмаган тақдирда ёки уни чақиришни рад этиш ҳақида қарор қабул қилган тақдирда, акциядорларнинг навбатдан ташқари умумий йиғилиши уни чақиришни талаб қилган шахслар томонидан чақирилиши мумкин бўлган ҳоллар мустасно;

– акциядорлар умумий йиғилишининг кун тартибини тайёрлаш;

– акциядорларнинг умумий йиғилиши ўтказиладиган сана, вақт ва жойни белгилаш;

– акциядорларнинг умумий йиғилиши ўтказилиши ҳақида хабар қилиш учун ҳамда умумий йиғилиш ўтказиш учун Компания акциядорларининг реестрини шакллантириш санасини белгилаш;

– йиллик молиявий ҳисоботларни халқаро молиявий ҳисобот стандартларига (ХМҲС) мувофиқ тарзда эълон қилишга ўтиш бўйича амалга ошириладиган ишларни мувофиқлаштириш;

- Компанияни қайта ташкил этиш, уставига ўзгартиш ва қўшимчалар киритиш ёки янги таҳрирдаги уставини тасдиқлаш, компаниянинг йиллик ҳисоботлари, бухгалтерия баланслари, фойда ва зарарлар ҳисобварақларини тасдиқлаш, унинг фойда ҳамда зарарларини тақсимлаш масалаларини ҳал қилиш учун акциядорларнинг умумий йиғилишига киритиш;
- мол-мулкнинг бозор қийматини белгилашни ташкил этиш;
- Компаниянинг йиллик бизнес-режасини тасдиқлаш;
- Компаниянинг Ижроия органи (Бошқаруви/Бошқарув аппарати) аъзоларини (раҳбаридан ташқари) сайлаш (тайинлаш), уларнинг ваколатларини муддатдан олдин тугатиш;
- Компания Бош директори/Ижроия органи (Бошқаруви/Бошқарув аппарати)нинг Компаниянинг йиллик бизнес-режасини бажариш қандай бораётганлиги юзасидан ҳар чораклик ҳисоботларини эшитиш;
- ички аудит хизматини ташкил этиш ва унинг ходимларини тайинлаш, шунингдек унинг ҳар чораклик ҳисоботларини эшитиш ва тасдиқлаш масаласини кўриб чиқиш;
- Компаниянинг Бош директор/Ижроия органи (Бошқарув/Бошқарув аппарати) фаолиятига дахлдор ҳар қандай ҳужжатдан эркин фойдаланиш ва Бош директори/Ижроия органи (Бошқарув/Бошқарув аппарати)дан Кузатув кенгаши зиммасига юклатилган вазифаларни бажариш учун уларни олиш. Олинган ҳужжатлардан Кузатув кенгаши ва унинг аъзолари фақат хизмат мақсадларида фойдаланишлари мумкин;
- Бош директор/Ижроия органи (Бошқарув/Бошқарув аппарати)га тўланадиган ҳақ ва компенсациялар миқдорини белгилаш;
- дивидендлар миқдори, уларни тўлаш шакли ва тартиби юзасидан тавсиялар бериш;
- Компаниянинг захира ва бошқа фондларидан фойдаланиш;
- Компаниянинг ваколатхоналарини очиш ҳамда филиаллар ва суғурта марказлари фаолиятини ташкил этиш;
- Компаниянинг шўба ва тобе корхоналарини ташкил этиш;
- қонун ҳужжатларида назарда тутилган ҳолларда йирик битимлар тузиш;
- қонун ҳужжатларида назарда тутилган ҳолларда Компания афилланган шахслари билан битимлар тузиш, бунда афилланган шахс билан тузилаётган битимни маъқуллаш ҳақидаги қарор мажлисда иштирок этаётган Компания Кузатув кенгаши аъзолари томонидан (битимни тузишдан манфаатдор бўлган кузатув кенгаши аъзоларидан ташқари) бир овоздан қабул қилинади. Бунда Компаниянинг афилланган шахси билан активларининг қиймати Компания соф активлари қийматининг ўн ёки ундан кўп фоизини ташкил этадиган битим тузиш тўғрисидаги қарор мол-мулкнинг қонун ҳужжатларига мувофиқ баҳоловчи ташкилот томонидан белгиланган бозор қиймати ҳисобга олинган, мустақил ташқи аудиторлик ташкилоти томонидан битимнинг шартлари ўрганилган ҳолда мажбурий тартибда қабул қилинади;
- қарор қабул қилинадиган кунда миқдори Компания активлари баланс қийматининг ўн беш фоизидан ортиқ бўлган суғурта тўловларини амалга ошириш ҳақида қарорлар қабул қилиш;
- Компаниянинг тижорат ва нотижорат ташкилотлардаги иштироки билан боғлиқ битимларни қонун ҳужжатларида белгиланган тартибда тузиш;
- Компаниянинг устав фондини (устав капиталини) кўпайтириш масалаларини, шунингдек Компания уставига компаниянинг устав фондини (устав капиталини) кўпайтириш ҳамда компаниянинг эълон қилинган акциялари сонини камайитириш билан боғлиқ ўзгартиш ва қўшимчалар киритиш тўғрисидаги масалаларни ҳал қилиш;
- қимматли қоғозлар чиқарилиши тўғрисидаги қарор (акциялар, облигациялар) ва эмиссия рисоласини тасдиқлаш;
- қимматли қоғозлар чиқарилиши тўғрисидаги қарорга (акциялар, облигациялар) ва эмиссия рисоласига ўзгартиришлар ва (ёки) қўшимчалар киритиш ва уларнинг матнини тасдиқлаш;

- қимматли қоғозларнинг ҳосилаларини чиқариш тўғрисида қарор қабул қилиш;
- қимматли қоғозлар савдоси ташкилотчиларининг майдончаларида юзага келаётган нархлар конъюнктурасидан келиб чиққан ҳолда акцияларни жойлаштириш (ташкил этилган қимматли қоғозлар савдоларига чиқариш) нархини белгилаш;
- Компания томонидан корпоратив облигациялар, шу жумладан акцияларга айирбошланадиган облигациялар чиқариш тўғрисида қарор қабул қилиш;
- Компаниянинг корпоратив облигацияларини қайтариб сотиб олиш тўғрисида қарор қабул қилиш;
- қонун ҳужжатларида белгиланган тартибда мол-мулкларни сотиб олиш ҳамда уларни сотиш ва ҳисобдан чиқариш билан боғлиқ масалаларни ҳал этиш;
- қонун ҳужжатларига ва ушбу уставга мувофиқ Кузатув кенгаши ваколатларига киритилган бошқа масалаларни ҳал этиш;
- Кузатув кенгаши ҳомийлик (хайрия) ёки беғараз ёрдам кўрсатиш (олиш) тартиби, шартларини белгилайди ҳамда мазкур масала юзасидан қарорни акциядорлар умумий йиғилиши ва қонун ҳужжатларида белгиланган доирада амалга оширади;
- аудиторлик текширувини ўтказиш (мажбурий аудиторлик текшируви бундан мустасно), аудиторлик ташкилотини белгилаш, унинг хизматларига тўланадиган энг кўп ҳақ миқдори ва у билан шартнома тузиш (шартномани бекор қилиш) тўғрисида қарор қабул қилиш;
- ваколати доирасига тегишли бўлган Компаниянинг ички ҳужжатларини тасдиқлаш;

3.18. Компания Кузатув кенгашининг ваколат доирасига киритилган масалалар ҳал қилиш учун Компаниянинг Бош директори/Ижроия органи (Бошқарув/Бошқарув аппарати)га ўтказилиши мумкин эмас.

КОМПАНИЯ ИЖРОИЯ ОРГАНИ (БОШҚАРУВ/БОШҚАРУВ АППАРАТИ), БОШ ДИРЕКТОРИ/БОШҚАРУВ РАИСИ

3.19. «KAFOLAT sug'urta kompaniyasi» AJнинг кундалик фаолияти акциядорлар умумий йиғилишида сайланадиган ҳамда лавозимга тасдиқланадиган, яккабошчилик асосида Бош директор ёхуд коллегиал Ижроия органи - Бошқаруви раиси/Бошқарув аппарати бош директори томонидан бошқарилади. Ижроия органи (Бошқарув/Бошқарув аппарати) аъзоларини тайинлаш, қоида тариқасида, чет эллик менежерлар иштирок этиши мумкин бўлган танлов бўйича саралаш асосида амалга оширилади.

Компания Ижроия органи (Бошқарув/Бошқарув аппарати) аъзолари 9 кишидан иборат бўлиши мумкин.

3.20. Компания Бош директори/Ижроия органи (Бошқарув/Бошқарув аппарати) ҳуқуқ ва мажбуриятлари амалдаги қонунчиликда, Компания уставида ҳамда уларнинг ҳар бири билан уч йил муддатга тузадиган шартномада белгиланиб, шартноманинг амал қилиш муддатини узайтириш ёки уни бекор қилиш мумкинлиги тўғрисида акциядорларнинг умумий йиғилиши томонидан ҳар йили қарор қабул қилинади. Шартнома Компания номидан Кузатув кенгашининг раиси ёки кузатув кенгаши ваколат берган шахс томонидан имзоланади.

Компания Бош директори/Ижроия органи (Бошқарув/Бошқарув аппарати) ушбу Уставга ҳамда акциядорларнинг умумий йиғилиши томонидан тасдиқланган Компания Ижроия органи (Бошқарув/Бошқарув аппарати) тўғрисидаги Низомга мувофиқ иш олиб боради.

Компания Бош директори/Ижроия органи (Бошқарув/Бошқарув аппарати) акциядорлар умумий йиғилишининг ва Компания Кузатув кенгашининг қарорлари бажарилишини ташкил этади.

Компания Бош директор/Ижроия органи (Бошқарув/Бошқарув аппарати)нинг ваколат доирасига Компаниянинг кундалик фаолиятига раҳбарлик қилишга доир барча масалалар киради, бундан акциядорлар умумий йиғилишининг ваколат доирасига ёки Компания Кузатув кенгашининг ваколат доирасига киритилган масалалар мустасно.

Бош директор/Ижроия органи (Бошқарув/Бошқарув аппарати) ҳомийлик (хайрия) ёки беғараз ёрдам кўрсатиш масалаларини Кузатув кенгаши ва/ёки акциядорлар умумий йиғилишининг қарорлари асосида амалга оширади;

Компания Кузатув кенгашининг қарорига биноан, белгиланган тартибда Ўзбекистон Республикасида ўзининг филиалларини, ваколатхоналарини очиши ҳамда шўба ва тобе корхоналарини ташкил этиши ва тугатиши мумкин.

3.21. Компаниянинг Бош директори/Ижроия органи (Бошқарув/Бошқарув аппарати) ўз хатти-ҳаракатлари учун Акциядорларнинг умумий йиғилиши ва Компаниянинг Кузатув кенгаши олдида жавоб беради.

Компания Ижроия органи (Бошқарув/Бошқарув аппарати)нинг қолган аъзоларига лавозим меҳнат ҳақи, мукофот, компенсация ва бошқа тўловлар Компания Кузатув кенгаши томонидан тасдиқланган Низом асосида белгиланади.

3.22. Компания Бош директори/Бошқарув раиси (Бошқарув аппарати бош директори) Компания номидан ишончномасиз иш юритади, шу жумладан унинг манфаатларини ифодалайди, ва ушбу масалаларни ҳал қилади:

- Компаниянинг оператив фаолиятини ташкил этади;
- Компания ходимларини, шунингдек Компаниянинг Қорақалпоғистон Республикаси, вилоятлар ва Тошкент шаҳар ҳамда «Андеррайтинг маркази» филиаллари директорлари, ўринбосарлари ва ходимларини лавозимига тайинлайди ҳамда лавозимидан озод этади;
- ўз ўринбосарлари ва ходимлар ўртасида вазифалар ҳамда ваколатларни тақсимлайди;
- Компания мулкни бошқаради, ишончномалар беради, банкларда банк ва бошқа ҳисобварақларини очади;
- Компаниянинг таркибий тузилмалари ходимларининг штат жадвалларини, келгусидаги ҳаражатларини тасдиқлайди, ходимларга лавозим ойлик меҳнат ҳақиға устамаларни тасдиқлайди;
- Компания тизимида бажарилиши мажбурий бўлган буйруқлар чиқаради ва кўрсатмалар беради;
- Компаниянинг филиалларига бўйсунувчи суғурта марказлари очади ва уларни тугатиш тўғрисида қарор қабул қилади;
- Компаниянинг белгиланган иш режаларини, Компания Акциядорлари умумий йиғилишининг ва Кузатув кенгашининг қарорларини бажарилишини ташкил этади;
- Компания фаолияти билан боғлиқ бўлган низолар юзасидан қонун ҳужжатларида белгиланган тартибда суд ва бошқа давлат органларида компания ҳуқуқ ва манфаатларини ҳимоя қилади;
- Компания номидан битимлар тузади;
- Компания фаолияти билан боғлиқ бошқа масалалар юзасидан қарорлар қабул қилади;
- суғурталаш қоидаларини ва Компания фаолиятини амалга оширишга доир меъёрий ҳужжатларни тасдиқлайди ва бекор қилади.

КОМПАНИЯНИНГ ФИЛИАЛЛАРИ

3.23. Компаниянинг Қорақалпоғистон Республикаси, вилоятлар, Тошкент шаҳар ва «Андеррайтинг маркази» филиалларига Компания Бош директори/Бошқарув раиси (Бошқарув аппарати бош директори) томонидан тайинланадиган директорлар раҳбарлик қилдилар.

Компания ходимларининг меҳнатига ҳақ тўлаш тўғрисидаги Низомни компания Компания Кузатув кенгаши билан келишилган ҳолда Бош директор/Бошқарув раиси (Бошқарув аппарати бош директори) тасдиқлайди.

3.24. Компания филиаллари ва суғурта марказлари мустақил юридик шахс ҳисобланмайди ўз фаолиятини «КАFOLAT sug'urta kompaniyasi» АЖ номидан Компания Бош директор/Бошқарув раиси (Бошқарув аппарати бош директори) томонидан берилган ишончнома асосида иш юритади.

3.25. Филиаллар Компания Кузатув кенгаши томонидан тасдиқланган «Филиаллар тўғрисида»ги Низом асосида ишлайди, думалоқ муҳрига ва бурчак штампига эга бўлиши мумкин.

3.26. Компания филиали:

- филиал суғурта марказларида иш йўлга қўйилишини назорат қилади;
- Компания Бош директори/Ижроия органи (Бошқарув/Бошқарув аппарати) томонидан белгилаган лимитлар доирасида мажбурий ва ихтиёрий суғурта турлари операцияларини амалга оширади;
- суд ва бошқа давлат органларида ўз ҳимоя қилади;
- Компания Бош директори/Ижроия органи (Бошқарув/Бошқарув аппарати) томонидан филиалга юкланган вазифа ва функцияларни бажаради.

3.27. Компания ўзи ташкил қилган таркибий тузилмаларини мол-мулк билан таъминлайди.

3.28. Компания ўзининг худудий филиалларига ва уларга буйсинувчи суғурта марказларига эга бўлиши мумкин.

ФИЛИАЛ СУҒУРТА МАРКАЗЛАРИ

3.29. Компания филиалларининг суғурта марказларига филиал директори томонидан тавсия қилинган ва Бош директор/Бошқарув раиси (Бошқарув аппарати бош директори) томонидан тайинланган бошлиқ раҳбарлик қилади.

3.30. Компания филиалининг суғурта марказлари мустақил юридик шахс ҳисобланмайди, улар «КАFOLAT sug'urta kompaniyasi» AJ номидан унга берилган ишончнома ва Суғурта маркази тўғрисидаги Низом асосида, белгиланган ҳуқуқ ҳамда ваколатлар доирасида фаолиятини амалга оширади.

Компания суғурта марказларига ушбу вазифалар юклатилади:

- Компания Бош директори/Ижроия органи (Бошқарув/Бошқарув аппарати) томонидан белгилаган лимит доирасида суғурта операцияларини амалга ошириш;
- суғурта пули миқдорини аниқлаш;
- моддий бойликлар бутлигини таъминлаш;
- белгиланган муддатларда ҳисоботларни Компания филиалига тақдим этиш;
- шартномалар тузиш, суд ва бошқа органларда ўз манфаатларини ҳимоя қилиш;
- ўзига юкланган бошқа вазифаларни бажариш.

4. УСТАВ ФОНДИ ВА АКЦИЯЛАР

4.1. Компаниянинг Устав фонди 45 000 000 000 (қирқ беш миллиард) сўм миқдориди шакллантирилган.

4.2. Компания акциядорлари томонидан сотиб олинган (жойлаштирилган) акцияларнинг сони 45 000 000 000 (қирқ беш миллиард) дона эгасининг номи ёзилган акциялардан иборат. Шундан, 44 990 350 000 (қирқ тўрт миллиард тўққиз юз тўқсон миллион уч юз эллик минг) донаси оддий ва 9 650 000 (тўққиз миллион олти юз эллик минг) донаси имтиёзли акциялардир.

Бир дона акциянинг номинал қиймати 1,0 (бир) сўмни ташкил этади.

Компания жойлаштирилган акцияларга қўшимча ҳар бирининг номинал қиймати 1,0 (бир) сўм бўлган **149 990 350 000 (бир юз қирқ тўққиз миллиард тўққиз юз тўқсон миллион уч юз эллик минг)** дона эгасининг номи ёзилган оддий акцияларни ҳамда **9 650 000 (тўққиз миллион олти юз эллик минг)** дона эгасининг номи ёзилган имтиёзли акцияларни жойлаштиришга ҳақлидир.

4.3. Компаниянинг акцияларини ва бошқа қимматли қоғозларини жойлаштириш чоғида

уларга ҳақ тўлаш пул ва бошқа тўлов воситалари, мол-мулк, шунингдек пулда ифодаланадиган баҳога эга бўлган ҳуқуқлар (шу жумладан мулкӣ ҳуқуқлар) орқали амалга оширилади.

4.4. Компаниянинг устав фонди (устав капитали) қўшимча акцияларни жойлаштириш йўли билан кўпайтирилиши мумкин.

Акцияларни қўшимча чиқариш фақат Компаниянинг илгари жойлаштирилган барча акциялари тўлиқ тўлангандан кейингина амалга оширилиши мумкин. Акцияларни қўшимча чиқариш тўғрисидаги қарор фақат ушбу Уставга акцияларнинг олдинги чиқарилиши натижаларига кўра жойлаштирилган ва эълон қилинган акциялар сонининг янги миқдорига нисбатан киритилган ўзгаришлар давлат рўйхатидан ўтказилганидан кейин қабул қилиниши мумкин.

Компания акцияларини хусусий йўсинда жойлаштириш (олдиндан маълум бўлган, сони чекланган инвесторлар орасида ёпиқ обуна қилиш, оммавий эълон бермаган ва реклама компанияси ўтказмаган ҳолда) ҳамда оммавий жойлаштириш (сони чекланган инвесторлар орасида рекламадан фойдаланган ҳолда очик обуна қилиш) йўли билан жойлаштиришга ҳақли.

Компания қўшимча акцияларни фақат ушбу Уставда белгиланган эълон қилинган акциялар миқдори доирасидагина жойлаштириши мумкин.

Компания томонидан акцияларни жойлаштириш муддати уларнинг чиқарилиши давлат рўйхатидан ўтказилган пайтдан эътиборан бир йилдан ошмаслиги керак.

Компания акцияларини жойлаштириш қонун ҳужжатларига мувофиқ амалга оширилади.

Қимматли қоғознинг бозор қиймати деганда энг эҳтимол тутилган нарх тушунилиб, унга кўра мазкур қимматли қоғоз очик бозорда битимнинг тарафлари барча зарур ахборотга эга бўлган ҳолда ўз манфаатлари йўлида оқилона ва ихтиёрий равишда ҳаракат қиладиган рақобат шароитида бошқа шахсга берилиши мумкин, битим нархининг баланд-пастлигида эса бирор-бир фавқулудда ҳолатлар, шу жумладан тарафлардан бирининг ушбу битимга қўшилиш мажбурияти акс этмайди.

Агар қимматли қоғозлар фонд биржаси листингига киритилган бўлса, уларнинг биржа котировкаси нархи мазкур қимматли қоғозларнинг бозор қиймати деб эътироф этилади.

Акцияларни жойлаштириш, шу жумладан акциядорлар ўртасида жойлаштириш тўғрисида қарор қабул қилишда акцияларни жойлаштириш (ташқил этилган қимматли қоғозлар савдоларига чиқариш) нархи Компания Кузатув кенгаши томонидан, қимматли қоғозлар савдоси ташкилотчиларининг савдо майдончаларида вужудга келаётган нархлар конъюнктурасидан келиб чиққан ҳолда белгиланади.

Компаниянинг қўшимча акциялари ва бошқа қимматли қоғозларини жойлаштириш чоғида уларга ҳақ тўлаш уларни чиқариш тўғрисидаги қарорда белгиланганидан кам бўлмаган нарх бўйича амалга оширилади.

4.5. Компаниянинг Устав фонди акцияларнинг номинал қийматини ёки уларнинг умумий сонини қисқартириш йўли билан, шунингдек акцияларнинг бир қисмини кейинчалик муомаладан чиқариш шarti билан қайтариб сотиб олиши йўли билан камайтирилиши мумкин. Бунда Компания Устав фондини 7 500 000 000,0 (етти миллиард беш юз миллион) сўмдан кам миқдоргача камайтиришга ҳақли эмас.

Компания Устав фондини камайтириш ҳақида қарор қабул қилинган кундан бошлаб кечи билан 30 кун ичида бу қарор хусусида ўз кредиторларини ёзма равишда хабардор қилади. Кредиторлар хабарнома юборилган кундан эътиборан кечи билан 30 кун ичида Компаниядан ўз мажбуриятларини муддатидан олдин ижро этишни ва устав фондини камайтирилиши билан боғлиқ зарарни тўлашни талаб қилишга ҳақли.

Акцияларнинг муомалада бўлиш тартиби, улар эгаларининг ҳуқуқ, ва бурчлари Ўзбекистон Республикаси қонунлари, унинг ҳудудида амал қилувчи қонун ҳамда меъёрий ҳужжатлар ва ушбу Устав билан белгилаб қўйилади.

5. КОМПАНИЯНИНГ СУҒУРТА ЗАХИРАЛАРИ, ФОНДЛАРИ ВА СОФ АКТИВЛАРИ

5.1. Компаниянинг суғурта захиралари:

Компаниянинг суғурта захиралари олинган суғурта мукофотларидан Ўзбекистон Республикасининг амалдаги қонун ҳужжатларида белгиланган тартибда ҳамда шартлар билан ҳосил қилинади;

Суғурта захиралари Компания ўз зиммасига олган мажбуриятларини бажаришни таъминлаш учун мўлжалланган;

Компания ҳосил қилган суғурта захиралари мусодара қилинмайди:

5.2. Компаниянинг захира фонди:

Компаниянинг захира фонди Компания ҳар йил якуни бўйича олган соф фойдасининг 10 фоизидан 20 фоизигача бўлган миқдорини мажбурий ажратиш йўли билан, миқдори Устав фондининг 30 фоизига тенг бўлгунга қадар ҳосил қилинади;

Захира фонди Компания кўрган зарарлар ўрнини қоплаш, имтиёзли акциялар бўйича дивидендлар тўлаш ва Ўзбекистон Республикасининг «Акциядорлик жамиятлари ва акциядорларнинг ҳуқуқларини ҳимоя қилиш тўғрисида»ги қонунига мувофиқ акцияларни сотиб олишни талаб қилиш ҳуқуқига эга бўлган акциядорларнинг талабига биноан акцияларни сотиб олиш учун мўлжалланган;

Захира фондидан бошқа мақсадларда фойдаланиш мумкин эмас.

5.3. Бошқа фондлар:

Компания солиқлар тўлангандан сўнг ва мажбурий ажратмалар амалга оширилгандан сўнг унинг ихтиёрида қоладиган соф фойдадан ўз фаолиятини таъминлаш учун бошқа зарур фондларни ҳосил қилиши мумкин.

Фондлар миқдори ва уларни ҳосил қилишга йўналтириладиган ажратмалар миқдори, шунингдек ушбу фондлардан фойдаланиш мақсадлари Компаниянинг Кузатув кенгаши тасдиқлайдиган Фондлар тўғрисидаги низом билан белгилаб қўйилади.

Компаниянинг суғурта захиралари ва фондлари маблағлари Ўзбекистон Республикасининг амалдаги қонун ҳужжатларига риоя этилган ҳолда инвестиция қилиниши ёки бошқа тарзда жойлаштирилиши мумкин.

5.4. Компания соф активларининг қиймати бухгалтерия ҳисоби маълумотлари бўйича, компания активлари ва мажбуриятларининг умумий суммаси ўртасидаги фарқ сифатида аниқланади.

Агар иккинчи молия йили ва ундан кейинги ҳар бир молия йили тугагандан кейин Компания акциядорларининг умумий йиғилишига тасдиқлаш учун тақдим этилган йиллик бухгалтерия балансига ёки аудиторлик текшируви натижаларига мувофиқ компания соф активларининг қиймати унинг устав фондидан (устав капиталидан) оз бўлиб чиқса, Компания ўз устав фондини (устав капиталини) соф активлари қийматидан ошиб кетмайдиган миқдоргача камайтиришини эълон қилиши шарт.

Компаниянинг устав фондини (устав капиталини) камайтириш ёки Компанияни тугатиш тўғрисида қарор қабул қилинмаган тақдирда унинг акциядорлари, кредиторлари, шунингдек ваколатли давлат органлари Компанияни суд тартибида тугатишни талаб қилишга ҳақли.

6. АКЦИЯДОРЛАРНИНГ ҲУҚУҚ ВА БУРЧЛАРИ

6.1. Акциядорлар:

- Компания акциядорлари реестрига киритилиши;
- депо ҳисобварағидан ўзига тааллуқли кўчирма олиш;
- Компания фойдасининг бир қисмини дивидендлар тарзида олиш;
- Компания тугатилган тақдирда ўзларига тегишли улушга мувофиқ мол-мулкнинг бир қисмини олиш;
- акциядорларнинг умумий йиғилишларида овоз бериш орқали компанияни бошқаришда иштирок этиш;

- Компаниянинг молия-хўжалик фаолияти натижалари тўғрисида тўлиқ ва ишончли ахборотни белгиланган тартибда олиш;
- олган дивидендини эркин тасарруф этиш;
- қимматли қоғозлар бозорини тартибга солиш бўйича ваколатли давлат органида, шунингдек судда ўз ҳуқуқларини ҳимоя қилиш;
- ўзига етказилган зарарнинг ўрни қопланишини белгиланган тартибда талаб қилиш;
- ўз манфаатларини ифодалаш ва ҳимоя қилиш мақсадида уюшмаларга ва бошқа нодавлат нотижорат ташкилотларига бирлашиш;
- қимматли қоғозларни олишда зарар кўриш, шу жумладан бой берилган фойда эҳтимоли билан боғлиқ таваккалчиликларни суғурта қилиш ҳуқуқига эга;
- акциядорлар қонун ҳужжатларига ва ушбу уставга мувофиқ бошқа ҳуқуқларга ҳам эга бўлиши мумкин;
- акциядор томонидан ҳуқуқларнинг амалга оширилиши бошқа акциядорларнинг ҳуқуқлари ва қонун билан қўриқланадиган манфаатларини бузмаслиги лозим;
- акцияларни бошқа шахсга беришга доир чеклов белгиланиши акциядорни - мазкур акциялар эгасини ушбу қонун ҳужжатларида белгиланган тартибда Компанияни бошқаришда иштирок этиш ва улар бўйича дивидендлар олиш ҳуқуқидан маҳрум қилмайди;
- Компания томонидан қўшимча акциялар чиқарилган ҳолатда акциядорлар Компания устав капиталидаги улушига пропорционал равишда имтиёзли сотиб олиш ҳуқуқига эгадирлар.
- акциядор (акциядорлар) даъво аризасини судда кўриб чиқиш чоғида Компаниядан ва гувоҳлардан суд томонидан кўриб чиқиладиган ишга тааллуқли бўлиши мумкин бўлган барча ҳужжатларни олишга ҳақли, бундан давлат сирларини ёки қонун билан қўриқланадиган бошқа сирни ташкил этувчи ҳужжатлар мустасно.

6.2. Оддий акцияларнинг эгалари бўлган акциядорлар амалдаги қонун ҳужжатларига ва ушбу уставга мувофиқ акциядорларнинг умумий йиғилишида мазкур йиғилиш ваколатига кирадиган барча масалалар бўйича овоз бериш ҳуқуқи билан иштирок этиши мумкин, шунингдек дивидендлар олиш, Компания тугатилган тақдирда эса ўзларига тегишли улушга мувофиқ Компания мол-мулкининг бир қисмини олиш ҳуқуқига эга.

6.3. Имтиёзли акцияларнинг эгалари бўлган акциядорлар, агар амалдаги қонун ҳужжатлари ва компания уставида бошқача қоида белгиланмаган бўлса, акциядорларнинг умумий йиғилишида овоз бериш ҳуқуқига эга эмас.

Компаниянинг имтиёзли акциялари уларнинг эгалари бўлган акциядорларга бир хил ҳажмда ҳуқуқлар беради ва оддий акциялар билан бир хил номинал қийматга эга бўлади.

Имтиёзли акцияларнинг эгалари бўлган акциядорлар акциядорларнинг умумий йиғилишида компанияни қайта ташкил этиш ва тугатиш тўғрисидаги масалалар ҳал этилаётганда овоз бериш ҳуқуқи билан иштирок этади.

Имтиёзли акцияларнинг эгалари бўлган акциядорлар акциядорларнинг умумий йиғилишида компания уставига имтиёзли акцияларнинг эгалари бўлган акциядорларнинг ҳуқуқларини чеклайдиган ўзгартиш ва қўшимчалар киритиш тўғрисидаги масалалар, шу жумладан, аввалги навбатдаги имтиёзли акциялар бўйича тўланадиган дивиденднинг миқдорини белгилаш ёки кўпайтириш ва (ёки) тугатилиш қийматини белгилаш ёки кўпайтириш масалалари, шунингдек имтиёзли акцияларнинг эгалари бўлган акциядорларга дивиденд ва (ёки) бу акцияларнинг тугатилиш қийматини тўлаш навбати бўйича имтиёзлар бериш ҳоллари ҳал этилаётганда овоз бериш ҳуқуқини олади.

Имтиёзли акцияларнинг эгалари бўлган акциядорлар умумий йиғилишнинг ваколат доирасига кирадиган барча масалалар бўйича овоз бериш ҳуқуқи билан акциядорларнинг умумий йиғилишида иштирок этиш ҳуқуқига имтиёзли акциялар бўйича дивидендлар тўлаш тўғрисида қарор қабул қилинмаган ёки дивидендларни тўлиқ тўламаслик тўғрисида қарор қабул қилинган акциядорларнинг йиллик умумий йиғилишидан кейинги йиғилишдан бошлаб эга бўлади. Имтиёзли акцияларнинг эгалари бўлган акциядорларнинг акциядорлар умумий йиғилишида иштирок этиш ҳуқуқи мазкур акциялар бўйича дивидендлар биринчи марта тўлиқ миқдорда тўланган пайтдан эътиборан бекор

қилинади.

6.4. Компания акциядорлари:

- мазкур Устав қоидаларига амал қилишга, Акциядорлар умумий йиғилиши ва Компаниянинг бошқа назорат органларининг қарорларини ўз ваколатлари доирасида бажаришга;
- Компания олдида ўз зиммаларига олган мажбуриятларини бажаришга;
- тижорат сири ҳисобланган компания фаолиятига боғлиқ бўлган ахборот маълумотларни ошқор қилмасликка мажбурлар.
- миноритар акциядор ҳужжатларни асосиз равишда талаб қилиш ва махфий ахборотлар, тижорат сирларини қўллаш йўли билан Компания бошқарув органи фаолиятига тўсқинлик қилмаслиги шарт.

6.5. Овоз берувчи акцияларнинг эгалари бўлган акциядорлар:

Компанияни қайта ташкил этиш тўғрисида;
жойлаштирилган акцияларни йириклаштириш ҳақида;
қонун ҳужжатларига мувофиқ Компания томонидан мол-мулкни олиш ёки бошқа шахсга бериш билан боғлиқ йирик битим (бундан буён матнда йирик битим деб юритилади) тузиш тўғрисида;
Компания уставига овоз берувчи акциялар эгалари бўлган акциядорларнинг ҳуқуқларини чекловчи ўзгартиш ва қўшимчалар киритиш ёки янги таҳрирдаги уставни тасдиқлаш тўғрисида акциядорларнинг умумий йиғилиши томонидан қарорлар қабул қилишда, агар улар қарши овоз берган бўлса ёхуд овоз беришда узрли сабабларга кўра иштирок этмаган бўлса, ўзларига тегишли акцияларнинг ҳаммаси ёки бир қисми Компания томонидан қайтариб сотиб олиншини талаб қилишга ҳақлидир.

Ўзларига тегишли акциялар Компания томонидан қайтариб сотиб олиншини талаб қилиш ҳуқуқига эга бўлган акциядорларнинг рўйхати овоз бериш натижасида қонунчиликка мувофиқ акцияларни қайтариб сотиб олишни талаб қилиш ҳуқуқи юзага келиши мумкин бўлган масалалар кун тартибига киритилган акциядорлар умумий йиғилишида иштирок этиш ҳуқуқига эга бўлган Компания акциядорлари реестрининг маълумотлари асосида тузилади.

Компания томонидан акцияларни қайтариб сотиб олиш ушбу акцияларнинг бозор қиймати бўйича амалга оширилади, бу қиймат Компаниянинг акцияларни қайтариб сотиб олишни талаб қилиш ҳуқуқи юзага келишига сабаб бўладиган ҳаракати натижасида қийматнинг ўзгариши ҳисобга олинмаган ҳолда аниқланади.

Компания акцияларининг 50 ва ундан ортиқ фоизи эгасига айланган шахс, агар у бунгача Компания акцияларига эгалик қилмаган ёки акцияларининг 50 фоизидан камроғига эгалик қилган бўлса, қолган акциялар эгаларига акцияларни бозор қиймати бўйича ўзига сотишлари борасидаги таклифини ўттиз кун ичида эълон қилиши шарт. Акциядорнинг ўзига тегишли акцияларни сотиши тўғрисидаги ёзма розилиги эълон қилинган кундан эътиборан ўттиз кун ичида олинган тақдирда, Компаниянинг 50 ва ундан ортиқ фоиз акциялари эгаси мазкур акцияларни сотиб олиши шарт.

Компания овоз берувчи акцияларининг ҳаммаси бўлиб камида бир фоизига эгалик қилувчи акциядорлар (акциядор) Компаниянинг молия йили тугаганидан кейин 90 кундан кечиктирмай акциядорларнинг йиллик умумий йиғилиши кун тартибига масалалар киритишга ҳамда компания кузатув кенгашига, бу органнинг миқдор таркибидан ошмайдиган тарзда номзодлар кўрсатишга ҳақли.

Миноритар акциядорлар (акциядор) молия йили тугаганидан кейин узоғи билан 90 кун ичида Компания акциядорларнинг йиллик умумий йиғилиши кун тартибига миноритар акциядорлар қўмитаси таркибига бу органнинг миқдор таркибидан ошмайдиган тарзда номзодлар кўрсатишга ҳақли.

7. КОМПАНИЯНИНГ МУЛКИ

7.1. Қуйидагилар Компания активларини шакллантириш манбалари ҳисобланади:

- Компаниянинг Устав фондига қўшиладиган пул маблағлари ва моддий бойликлар;
- уставга мувофиқ фаолият кўрсатишдан ва қимматли қоғозлардан олинган даромадлар;
- жалб қилинган (қарзга олинган) маблағлар. Буларга банк ва бошқа ташкилотларнинг кредитлари, Компанияга вақтинча фойдаланиш учун берилган маблағлар, қимматли қоғозлар

(акциялардан ташқари) чиқаришдан тушган маблағлар, шунингдек Ўзбекистон Республикаси қонунлари, унинг ҳудудида амал қилувчи қонун ҳамда меъёрий ҳужжатлар билан тақиқланмаган бошқа манбалар.

7.2. Компания:

- Компаниянинг уставини, уни ташкил этиш тўғрисидаги қарорни, давлат рўйхатидан ўтказилганлиги ҳақидаги гувоҳномани;
- ўз балансидаги мол-мулкка бўлган ҳуқуқини тасдиқловчи ҳужжатларни;
- акциядорларнинг умумий йиғилиши ва Компаниянинг бошқа органлари томонидан тасдиқланадиган ҳужжатларни;
- Компаниянинг филиали ёки ваколатхонаси ҳақидаги низомни;
- Компаниянинг йиллик ҳисоботини;
- эмиссиявий қимматли қоғозларни чиқариш тўғрисидаги қарорни;
- акциялар эмиссияси рисоласини;
- бухгалтерия ҳисобига доир ҳужжатларни;
- тегишли органларга тақдим этиладиган молиявий ҳисоботларни;
- акциядорлар умумий йиғилишларининг, Кузатув кенгаши ва Компания Бош директори/Ижроия органи (Бошқарув/Бошқарув аппарати) мажлисларининг баённомаларини, шунингдек буйруқларни;
- Компаниянинг аффилиланган шахслари рўйхатларини;
- Компания акциядорларининг реестрларини;
- Компания аудиторлик ташкилотининг хулосалари ва ҳисоботларини, назорат қилувчи давлат органларининг текширувлари далолатномаларини сақлаши шарт.

Компания қонун ҳужжатларига ва Уставига мувофиқ бошқа ҳужжатларни ҳам сақлаши шарт.

7.3. Компания ушбу Уставнинг 7.2. банди биринчи қисмида назарда тутилган ҳужжатлардан акциядорларнинг фойдаланиш имкониятини таъминлайди, бундан бухгалтерия ҳисобига доир ҳужжатлар, бошқарув органлари мажлисларининг баённомалари, шунингдек Компания буйруқлари ва акциядорларининг реестри мустасно.

Компания акциядорининг ёзма талабига кўра унга Уставда назарда тутилган ҳужжатларнинг кўчирма нусхаларини ҳақ эвазига тақдим этиши шарт. Ҳақ миқдори компания томонидан белгиланади ҳамда ҳужжатларнинг кўчирма нусхаларини тайёрлаш харажатларининг қийматидан ва ҳужжатларни почта орқали жўнатиш билан боғлиқ, харажатлардан ортиб кетмаслиги керак.

Компания сўралаётган ахборотни акциядорга электрон тарзда тақдим қилишга ҳақли.

Акциядорлар компания ёки унинг фаолияти тўғрисидаги хизмат, тижорат сирини ёки қонун билан кўриқланадиган бошқа сирни ташкил этувчи ахборотни ошкор қилишга ҳақли эмас.

8. Фойда ва зараларни тақсимлаш, дивиденд тўлаш

8.1. Компаниянинг даромади молия-хўжалик фаолиятининг умумлаштирувчи кўрсаткичи бўлиб, у тушган маблағлар (даромад) билан қилинган харажатлар (суғурта товон тўловлари, суғурта ходисасини олдини олиш тадбирлари харажатлари, иш юритиш ҳамда меҳнатга ҳақ тўлаш харажатлари ва бошқалар) ўртасидаги фарқ сифатида аниқланади. Солиқлар ва бошқа мажбурий тўловлар тўланганидан сўнг қоладиган маблағлар соф фойда ҳисобланади. Бу фойдадан Компания захира ва бошқа фондлари ҳосил қилинади, акциядорлар ўртасида дивидендлар кўринишида тақсимланади ва амалдаги қонун ҳужжатларига мувофиқ ва ушбу Уставда кўзда тутилган мақсадларга сарфланади.

Молия-хўжалик фаолияти жараёнида юзага келувчи зарарлар Компаниянинг захира фонди ва мулк ҳисобидан қопланади.

8.2. Дивидендлар Компания тасарруфида қоладиган соф фойдадан ва (ёки) ўтган йилларнинг тақсимланмаган фойдасидан тўланади. Имтиёзли акциялар бўйича дивидендлар Компаниянинг бунинг учун махсус мўлжалланган фондлари ҳисобидан ҳам тўланиши мумкин.

Компания молиявий йилнинг биринчи чораги, ярим йиллиги, тўққиз ойи натижаларига кўра ва (ёки) молиявий йил натижаларига кўра дивидендлар тўланиши ҳақида қарорлар қабул қилиш (эълон қилиш) ҳуқуқига эга. Акцияларнинг ҳар бир тури бўйича дивидендлар молиявий йилнинг биринчи чораги, ярим йиллиги, тўққиз ойи натижаларига кўра ва (ёки) молиявий йил натижаларига кўра) тўлаш, дивидендларнинг миқдори ҳамда уни тўлаш шакли ва тартиби тўғрисидаги қарор Кузатув кенгаши тавсияси асосида ва, молиявий ҳисоботнинг ишончлилиги ҳақида аудиторлик хулосаси мавжуд бўлган тақдирда, молиявий ҳисобот маълумотлари асосида Акциядорларнинг умумий йиғилиши томонидан қабул қилинади. Дивидендлар миқдори Компания Кузатув кенгаши тавсия этган миқдордан кўп бўлиши мумкин эмас. Акциядорларнинг умумий йиғилиши акцияларнинг муайян турлари бўйича дивидендлар тўламаслик тўғрисида, шунингдек ушбу Уставда дивиденд миқдори белгилаб қўйилган имтиёзли акциялар бўйича тўлиқ бўлмаган миқдорда дивидендлар тўлаш ҳақида қарор қабул қилишга ҳақли.

Дивидендларни тўлаш муддати ва тартиби акциядорларнинг умумий йиғилиши қарорида белгиланади. Дивидендларни тўлаш муддати шундай қарор қабул қилинган кундан эътиборан олти кундан кеч бўлмаслиги лозим.

Компания томонидан оддий акциялар бўйича ҳисобланган дивидендларни тўлаш акциядорларнинг дивидендларни олишга бўлган тенг ҳуқуқларига риоя этилган ҳолда амалга оширилади.

Дивиденд тўлаш тўғрисидаги қарорда дивидендлар тўлаш бошлангани ва тугайдиган саналар кўрсатилган бўлиши лозим.

Молиявий йилнинг биринчи чораги, ярим йиллиги ва тўққиз ойи натижаларига кўра дивидендлар тўлаш тўғрисидаги қарор тегишли давр тугаганидан сўнг уч ой ичида қабул қилиниши мумкин.

Тўлиқ молия йили якунларига кўра дивидендлар тўлови Акциядорларнинг умумий йиғилиши қарори асосида, ҳар бир чорак, ярим йиллик ва тўққиз ойи натижаларига кўра тўланган дивидендлар ҳисобга олинган ҳолда амалга оширилади. Акциядорларнинг умумий йиғилишининг қарорига мувофиқ дивидендлар пул маблағлари ёки бошқа қонуний тўлов воситалари ёхуд компаниянинг қимматли қоғозлари билан тўланиши мумкин.

Компаниянинг имтиёзли акциялари бўйича дивидендларни қимматли қоғозлар билан тўлашга йўл қўйилмайди.

Дивиденд акциядорлар ўртасида уларга тегишли акцияларнинг сони ва турига мутаносиб равишда тақсимланади.

Имтиёзли акциялар бўйича дивидендлар миқдори имтиёзли акциялар номинал қийматининг 25 фоизини ташкил этади. Имтиёзли акциялар бўйича дивидендлар тўлаш учун маблағ етарли бўлмаганда захира фонд маблағларидан фойдаланилади.

Акциядорларга дивидендларни тўлаш тўғрисида қарор қабул қилинган компания акциядорларининг умумий йиғилишини ўтказиш учун шакллантирилган компания акциядорларининг реестрида қайд этилган шахслар акциялар бўйича дивиденд олиш ҳуқуқига эга.

Дивидендлар акциядорларнинг умумий йиғилиши томонидан белгиланган муддатларда компаниянинг айби билан тўланмаган тақдирда тўланмаган (олинмаган) дивидендлар бўйича Ўзбекистон Республикаси Марказий банки томонидан белгиланган қайта молиялаштириш ставкаларидан келиб чиққан ҳолда пеня ҳисобланади.

Компания томонидан ҳисобланган дивидендларни ва пеняларни тўлашни акциядор суд тартибида талаб қилишга ҳақли.

8.3. Компания:

- агар дивидендлар тўланганидан пайтда Компанияда банкротлик белгилари мавжуд бўлса ёки Компанияда шундай белгилар дивидендларни тўлаш натижасида пайдо бўлса;

- агар Компания соф активларининг қиймати унинг устав фонди (устав капитали) ва захира фонди суммасидан кам бўлса, акциялар бўйича дивидендлар тўлаш тўғрисида қарор қабул қилишга ҳамда дивидендлар тўлашга ҳақли эмас.

Уставнинг ушбу бандида кўрсатилган ҳолатлар бартараф этилгач, Компания ҳисобланган дивидендларни акциядорларга тўлаши шарт.

Компания дивидендларнинг миқдорини улардан ундириладиган солиқларни инобатга олмаган ҳолда эълон қилади. Компания тўланадиган дивидендлар миқдори тўғрисидаги маълумотларни қимматли қоғозлар бозорини тартибга солиш бўйича ваколатли давлат органининг ва компаниянинг расмий веб-сайтларида қонун ҳужжатларида белгиланган муддатларда эълон қилади.

8.4. Биринчи навбатда имтиёзли акциялар бўйича дивидендлар, кейин оддий акциялар бўйича дивидендлар тўланади. Имтиёзли акциялар бўйича қатъий белгиланган дивидендлар тўлашга етарли фойда мавжуд бўлган тақдирда Компания ушбу акциялар эгаларига дивидендлар тўлашни рад этишга ҳақли эмас. Акс ҳолда акциядорлар дивидендлар тўлашни суд орқали талаб қилишлари мумкин. Фойда етарли бўлмаганда ёки Компания зарар кўриб ишлаган бўлса Компания ана шу мақсад учун тузилган ўзининг захира фонди ҳисобидан ва унинг доирасидагина имтиёзли акциялар бўйича дивидендлар тўлаши мумкин.

Эгаси ёки эгасининг қонуний ҳуқуқий вориси ёхуд меросхўри томонидан уч йил ичида талаб қилиб олинмаган дивиденд акциядорларнинг умумий йиғилиши қарорига кўра компания ихтиёрида қолади.

Компания Ўзбекистон Республикаси норезидент акциядорининг ёзма талабига кўра унга ҳисобланган дивидендларни эркин айирбошланадиган валютага айирбошлаб, норезидент акциядор тақдим этган банк ҳисобварағига ўтказиб бериши шарт.

Компания акциядорларининг реестридан олинган, компания томонидан тасдиқланган кўчирма ҳамда компания бухгалтериясининг тўланган дивидендларнинг суммаси ва улар ҳисобланган сана тўғрисидаги маълумотномаси айирбошлаш учун асос бўлиб хизмат қилади.

8.5. Дивидендларга солиқ солиш солиқ тўғрисидаги қонун ҳужжатларига мувофиқ амалга оширилади.

9. МОЛИЯ ҲИСОБИ ВА ҲИСОБОТИ

9.1. Компания Ўзбекистон Республикаси қонунлари ва меъёрий ҳужжатларига мувофиқ ва тартибда ўз фаолияти бухгалтерия ҳисоб-китобини ҳамда статистик ҳисоботни юритади ва молиявий ҳисобот тақдим этади.

9.2. Компания учун молия йили 1 январдан 31 декабргача белгиланади.

9.3. Компанияда бухгалтерия ҳисобининг ташкил этилиши, ҳолати ва ишончилиги, тегишли органларга ҳар йилги ҳисобот ва бошқа молиявий ҳисоботлар, шунингдек Компаниянинг расмий веб-сайтида ва оммавий ахборот воситаларида акциядорларга, кредиторларга тақдим этиладиган Компания фаолияти тўғрисидаги маълумотлар ўз вақтида тақдим этилиши учун жавобгарлик Компания Бош директори/Ижроия органи (Бошқарув/Бошқарв аппарати)нинг зиммасида бўлади.

9.4. Акциядорларнинг умумий йиғилишига тақдим этилган Компаниянинг йиллик ҳисоботи, бухгалтерия баланси, фойда ва зарарлар ҳисобварағидаги маълумотлар тўғри бўлиши керак.

9.5 Компаниянинг молиявий ҳисоботида кўрсатилган ва акциядорларнинг умумий йиғилишига тақдим этиладиган молиявий ҳисоботдаги, бухгалтерия балансидаги, фойда ва зарарлар ҳисобварағидаги маълумотларнинг ишончилиги мулкӣ манфаатлари Компания ёки унинг акциядорлари билан боғлиқ бўлмаган аудиторлик ташкилоти томонидан тасдиқланган бўлиши керак.

9.6. Компаниянинг йиллик ҳисоботи Акциядорларнинг умумий йиғилиши ўтказиладиган санадан 10 кун кечиктирмай Компания Кузатув кенгаши томонидан дастлабки тарзда тасдиқланиши лозим.

9.7. Аффилланган шахслар билан тузилган битимлар тўғрисидаги ахборот, шу жумладан

аффилиланган шахсларнинг ёзма билдиришлари ва битимлар бўйича қабул қилинган қарорларнинг тўлиқ таърифлари, қарор қабул қилган шахслар ҳақидаги маълумотлар ҳамда аффилиланган шахслар билан битимлар тузиш чоғидаги манфаатлар тўқнашуви тўғрисидаги маълумотлар Компания йиллик ҳисоботининг бир қисмидир.

9.8. Компания ўзи ва аффилиланган шахс ўртасида тузилган битим ҳақидаги ахборотни битим тузилган пайтдан эътиборан 72 соат ичида Корпоратив ахборотнинг ягона порталида ҳамда нинг расмий веб-сайтида ошкор этиши шарт.

10. КОМПАНИЯ ТЎҒРИСИДАГИ АХБОРОТ

10.1. Компания қонун ҳужжатларида белгиланган тартибда ва муддатларда ахборотни ошкор қилишни амалга ошириши шарт.

Акциялари фонд биржасининг листингига киритилган тақдирда компания фонд биржасининг расмий веб-сайтида компания уставининг матнини, шу жумладан унга доир ўзгартириш ва кўшимчаларни, шунингдек ошкор этилиши мажбурий бўлган бошқа ахборотни (шу жумладан қимматли қоғозлар бўйича ҳисоботни) қонун ҳужжатларида белгиланган тартибда эълон қилиши шарт.

Фонд биржасининг веб-сайтида ахборотнинг ошкор қилинганлиги компанияни қонунда назарда тутилган ҳолларда давлат органларининг ёзма сўровига кўра ахборот тақдим этиш мажбуриятидан озод қилмайди.

11. ИЧКИ АУДИТ ХИЗМАТИ

11.1. Ички аудит хизмати Компаниянинг Кузатув кенгашига ҳисобдордир.

11.2. Ички аудит хизмати Компаниянинг Бош директори/Ижроия органи (Бошқарув/Бошқарув аппарати), филиаллари ва суғурта марказлари томонидан қонун ҳужжатларига, таъсис ҳужжатлари ва бошқа ҳужжатларга риоя этилишини, бухгалтерия ҳисоби ва молиявий ҳисоботларда маълумотларнинг тўлиқ ҳамда тўғри акс этирилиши таъминланишини, хўжалик операцияларини амалга оширишнинг белгиланган қоидалари ва тартиб-тамоилларига риоя этилишини, активларнинг сақланишини, шунингдек Компанияни бошқариш юзасидан қонун ҳужжатларида белгиланган талабларга риоя этилишини текшириш ва бу борада мониторинг олиб бориш орқали Компаниянинг Бош директори/Ижроия органи (Бошқарув/Бошқарув аппарати), филиаллари ва суғурта марказлари фаолиятини назорат қилади ҳамда уларнинг фаолиятига баҳо беради.

Компаниянинг ички аудит хизмати ички назоратни, шу жумладан, 50 фоиздан зиёд улуши Компанияга тегишли бўлган юридик шахслар билан ўтказилган операциялар устидан назоратни амалга оширади.

11.3. Ички аудит хизмати ўз фаолиятини Ўзбекистон Республикаси Вазирлар Маҳкамаси томонидан белгиланадиган тартибга ҳамда компания кузатув кенгаши томонидан тасдиқланган Низомга мувофиқ амалга оширади.

12. АУДИТ

12.1. Аудитор (аудитор ташкилот) Компания билан тузилган шартномага мувофиқ қонун ҳужжатларида белгиланган тартибда унинг молия-хўжалик фаолиятини текширади ва аудиторлик хулосаси тақдим этади.

Аудиторлик ташкилоти Компаниянинг молиявий ҳисоботи ва молияга доир бошқа ахборот ҳақидаги нотўғри хулосани ўз ичига олган аудиторлик хулосаси тузилганлиги оқибатида етказилган зарар учун Компания олдида жавобгар бўлади.

12.2. Аудитор Компаниянинг молия-хўжалик фаолиятини текшириш натижалари асосида хулоса тузади.

Хулосада қуйидагилар акс эттирилган бўлиши лозим:

- Компаниянинг ҳисоботлари ва бошқа молия ҳужжатларидаги маълумотларнинг тўғрилигига берилган баҳо;
- бухгалтерия ҳисобини юритиш ва молиявий ҳисоботни тақдим этиш тартибининг, шунингдек молия-хўжалик фаолиятини амалга оширишда қонун ҳужжатларининг бузилиш ҳоллари ҳақида ахборот.

13. КОМПАНИЯНИ ҚАЙТА ТАШКИЛ ЭТИШ

13.1. Компанияни қайта ташкил этиш акциядорлар умумий йиғилишининг қарорига кўра қўшиб юбориш, қўшиб олиш, бўлиш, ажратиш чиқариш ва ўзгартириш шаклида амалга оширилади.

Қонун ҳужжатларида белгиланган ҳолларда юридик шахсларни қўшиб юбориш, қўшиб олиш ёки ўзгартириш шаклида қайта ташкил этиш фақат ваколатли давлат органларининг розилиги билан амалга оширилиши мумкин.

13.2. Қайта ташкил этиш тўғрисида қарор қабул қилинган санадан эътиборан Компания 30 кундан кечиктирмай ўз кредиторларини бу ҳақда ёзма равишда хабардор этади. Кредитор Компаниядан мажбуриятларни тўхтатиш ёки муддатидан илгари бажаришни ҳамда зарарнинг ўрнини қоплашни қуйидаги муддатларда ёзма равишда хабар бериши йўли билан талаб қилишга ҳақлидир:

- қўшиб юбориш, бирлаштириш ёки қайта тузиш тарзида қайта ташкил этиш ҳақидаги хабарни Компания кредиторга юборган санадан бошлаб узоғи билан 30 кун ичида;
- бўлиш ёки ажратиш чиқариш тарзида қайта ташкил этиш тўғрисидаги хабарни Компания кредиторга юборган санадан бошлаб узоғи билан 60 кун ичида.

14. КОМПАНИЯНИ ТУГАТИШ

14.1. Компаниянинг тугатилиши ҳуқуқ ва мажбуриятларни ҳуқуқий ворислик тартибида бошқа шахсларга ўтказмаган ҳолда компания фаолиятини тугатишга сабаб бўлади. Компания қонунда белгиланган тартибда ҳамда Ўзбекистон Республикаси Фуқаролик Кодексининг 53-56 моддаларига мувофиқ, шу жумладан:

- Акциядорлар умумий йиғилишининг қарори билан;
- Ўзбекистон Республикасининг қонун ҳужжатларида назарда тутилган ҳолларда иқтисодий суднинг қарорига биноан тугатилади.

14.2. Компания Акциядорларнинг умумий йиғилиши сайлаган ёки иқтисодий суди тайинлаган тугатиш комиссияси томонидан тугатилади.

14.3. Компания ихтиёрий равишда тугатилган тақдирда, компаниянинг кузатув кенгаши компанияни тугатиш ва тугатувчини ёки тугатиш комиссиясини тайинлаш тўғрисидаги масалани акциядорларнинг умумий йиғилиши ҳал қилиши учун олиб чиқади.

Компания ихтиёрий равишда тугатилаётганда акциядорларининг умумий йиғилиши компанияни тугатиш ва тугатиш комиссиясини тайинлаш ҳақида қарор қабул қилади. Тугатиш комиссияси таркибига давлат мулкани тасарруф этишга ваколатли органнинг вакили киритилади.

Тугатиш комиссияси нинг тугатилиши ҳақида оммавий ахборот воситаларида эълон беради. Компанияни ихтиёрий равишда тугатиш тўғрисидаги эълон рўйхатдан ўтказувчи орган томонидан унинг расмий веб-сайтига жойлаштирилади.

Компаниянинг тугатилиши ҳақидаги эълонда унинг кредиторлари талабларини билдириш тартиби ва муддатлари кўрсатилади. Бу муддат тугатиш тўғрисидаги эълон чиққан пайтдан эътиборан икки ойдан кам бўлмаслиги керак.

14.4. Компания суднинг қарорига кўра тугатилаётганда тугатиш комиссиясини тайинлаш қонун ҳужжатларида белгиланган тартибда амалга оширилади.

Тугатиш комиссияси тайинланган пайтдан эътиборан компания ишларини бошқариш бўйича барча ваколатлар унга ўтади. Тугатиш комиссияси компания номидан судда иштирок этади.

Рўйхатдан ўтказувчи органнинг қарорига кўра Компанияни тугатиш Компания молия-хўжалик фаолияти амалга оширилмаганлиги сабабли белгиланган тартибда ҳаракатсиз режимга ўтказилган

пайтдан эътиборан уч йил ичида унинг фаолияти тикланмаган тақдирда амалга оширилади. Бунда тугатувчи тайинланмайди.

14.5. Тугатилаётганда компания кредиторларининг талаблари тугатишни амалга ошириш билан боғлиқ харажатлар, шунингдек Компаниянинг асосий вазифаларини таъминлаш заруриятидан келиб чиқадиган харажатлар тўланганидан сўнг қуйидаги тартибда қаноатлантирилади:

биринчи навбатда - ҳаётни суғурта қилиш соҳасида мажбурий суғурта шартномалари бўйича суғурта қилдирувчиларнинг талаблари;

иккинчи навбатда - суғурта қилдирувчиларнинг бошқа мажбурий суғурта шартномалари бўйича талаблари;

учинчи навбатда - бошқа суғурта қилдирувчиларнинг (наф олувчиларнинг) талаблари;

тўртинчи навбатда - бюджетга, бюджетдан ташқари фондларга тўловларни назарда тутувчи тўлов (ижро) ҳужжатлари бўйича талаблар. Кўрсатилган талаблар тўлиқ қаноатлантирилгандан кейин ижтимоий суғурта бўйича талаблар ҳамда жиноят ёки маъмурий ҳуқуқбузарлик туфайли фуқароларнинг мол-мулкига етказилган зарарни қоплаш бўйича талаблари қаноатлантирилади;

бешинчи навбатда - компаниянинг бошқа кредиторлари талаблари.

14.6. Тугатилаётган Компаниянинг кредиторлар билан ҳисоб-китоблардан кейин қолган мол-мулки тугатувчи томонидан акциядорлар ўртасида қуйидаги навбат бўйича тақсимланади:

биринчи навбатда Ўзбекистон Республикаси “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги (янги таҳрирдаги) Қонунининг 40-моддасига мувофиқ қайтариб сотиб олиниши лозим бўлган акциялар бўйича тўловлар амалга оширилади;

иккинчи навбатда имтиёзли акциялар бўйича ҳисобланган, бироқ тўланмаган дивидендларни ва компания имтиёзли акциялар бўйича ушбу акцияларнинг номинал қиймати тўлаш амалга оширилади;

учинчи навбатда тугатилаётган компаниянинг мол-мулкни оддий акциялар эгалари бўлган акциядорлар ўртасида тақсимлаш амалга оширилади.

Мол-мулкни ҳар бир навбат бўйича тақсимлаш аввалги навбат бўйича мол-мулк тўлиқ тақсимлаб бўлинганидан кейин амалга оширилади.

Агар Компаниядаги мавжуд мол-мулк ҳисобланган, бироқ тўланмаган дивидендларни ва компания уставида белгиланган тугатиш қийматини имтиёзли акцияларнинг эгалари бўлган барча акциядорларга тўлаш учун етарли бўлмаса, мол-мулк имтиёзли акцияларнинг эгалари бўлган акциядорлар ўртасида уларга тегишли акцияларнинг сонига мутаносиб равишда тақсимланади.

Мол-мулкни тугатиш қийматининг чет эллик инвестор бўлган акциядорга ўтказиладиган қисмини компания хорижий валютага айирбошлаб бериши шарт.

14.7. Рўйхатдан ўтказувчи орган юридик шахсларнинг ягона давлат реестрига тегишли ёзувларни киритган пайтдан эътиборан компанияни тугатиш тамомланган, компания эса фаолиятини тугатган деб ҳисобланади.

Рўйхатдан ўтказувчи орган компания тугатилганлиги ҳақидаги тегишли ёзувни фақат компаниянинг қимматли қоғозлари чиқарилишлари давлат рўйхатидан ўтказилганлиги бекор қилинганидан кейингина киритади.

15. КОМПАНИЯ ОЛДИДА ЖАВОБГАРЛИК

15.1. Компания Кузатув кенгаши раҳбари ва аъзолари, Бош директор/Ижроия органи (Бошқарув/Бошқарув аппарати) раҳбари ва аъзолари Ўзбекистон Республикасининг амалдаги қонунчилигида белгиланган тартибда Компания олдида жавобгар бўладилар.